

Bummelbagg Rippezwigger 2017

Als Erscht`s möchte y d Luzärner hätzlig begriesse
mir hätte bim ene Hoor uf si verzichte miesse
bevor die mit der SBB vo Luzärn in Züri lande
hätte sy jo könne immen e sone Schyssalpino strande

D Rippezwigger kaasch bald mit der Lupe go sueche
S wänn bi uns aifach kaini Pfyffer bueche
Aber wär sait scho, dass die wo mir sinn nit länge
wenn nur scho Drei der Rahme spränge

Grad vorhär het my ain gfroggt was mir Basler in Züri mache
y han em miesse saage, dasch denn gar nüt zum lache
das sygi nämmlig für die komplizierti Organisation
vo unserer Clique - e Stroofaktion

Ych bi suur uf der Petrus und uf dä Trump in Amerika
s git kainerlai Begründig wie me die unterschaide ka
als Fasnächtler kann ych s`aifach nit verstoo
wieso die immer mien so Saich uuseloo

Vorne sinn d Drummler hinde sinn d Pfyffer
sogenannti Kläpplischlyffer
do maint ain vo vorne – s Echo vo Schaffhuuse
hinde dien sy nit schlyffe hinde dien sy pfuuse

Jetzt wo d Monika Fasnacht kai Jassjob me het
könnt sy uns unterstütze - das wärs, do mach y e Wett
es isch zum öbbis Neus lehre jo nie z spoot
Instruktion in der Pfyfferstund - wien e Schieber goot

Mir wänn der Brigitte no danggscheen saage
für ihre Ysatz - zämme mit em Granggewaage
au der Helen, der Gaby und em Urs
für dä gratis und franko Nothälferkurs

Y ha denn nodrätlig no der Dr. FMH buecht
wo d Brigitte us fasnächtlicher Sicht untersuecht
lut Diagnose kunnt`s weder vom suffe no vom kiffe
sy isch in Panik grote, dass es dusse scho wiider könnt schiffe

Sueche, entwärfe, plane, konstruiere
zaichne, berächne und no vor em montiere
e Buissinesplan und e Zytraschter erstelle
anderi frooge, ob sy das au so hänn welle
Längi vo de Schrübli bestimme, der Karli yschalte
das wo schlussändlig druff kunnt gschtalte
us 200 Muschter ai Aug usesueche
d Finger verschmiere und lyslig flueche
aaneleege und trockne lo
nonemol über d Biecher go
Sicherheitscheck wäg em uuseluege
grundiere und zuedegge vo de Fuege
Auge usschnyyde und 10 Mool brobiere
Hauptbroob mehrmools duurefiehre
verglyyche ob me gegenüber em Original ka lande
und scho isch em Major sy Kopf entstande